

31/08/2000

10,000 sambut merdeka di Dataran Shah Alam

SHAH ALAM, Rabu - Lebih 10,000 orang membanjiri Dataran Shah Alam bagi menyambut detik Hari Kemerdekaan ke-43 yang berlangsung dalam suasana meriah dan penuh gemilang di sini malam ini.

Sambutan yang bersejarah itu membawa erti kepada Selangor yang pertama kali menjadi tuan rumah sambutan kemerdekaan pada alaf baru ini.

Acara itu turut dihadiri Perdana Menteri Datuk Seri Dr Mahathir Mohamad dan isteri, Datin Seri Dr Siti Hasmah Mohd Ali, Timbalan Perdana Menteri, Datuk Seri Abdullah Ahmad Badawi dan isteri, Datin Seri Endon Mahmood, Menteri Besar Dr Mohamad Khir Toyo dan isteri, Zaharah Kechik, serta menteri Kabinet dan orang kenamaan lain.

Ketibaan Perdana Menteri disambut Menteri Kebudayaan, Kesenian dan Pelancongan Datuk Abdul Kadir Sheikh Fadzir yang juga Pengerusi Jawatankuasa Sambutan Hari Kebangsaan tahun ini.

Semangat patriotisme dan cintakan negara di kalangan rakyat yang menyambut detik bersejarah itu jelas terbayang dengan laungan Merdeka yang bergemuruh sebanyak tujuh kali didahului Dr Mahathir.

Serentak itu, Jalur Gemilang dikibarkan dengan iringan lagu Negaraku diikuti persembahan bunga api dan lagu tema hari kebangsaan, KeranaMu Malaysia.

(END)